

祕傳證治要訣卷六

大醫院使載元禮述

諸嗽門

嗽證

古人云臟腑皆有咳嗽夫嗽屬肺何爲臟腑亦皆有之蓋咳嗽爲病有自外而入者有自內而發者風寒暑濕外也七情饑飽內也風寒暑濕先自皮毛而入皮毛者肺之合故雖外邪欲傳臟腑亦必先從其合而爲嗽此自外而入者也七情饑飽內有所傷則邪氣上逆肺爲氣出入之道故五臟之邪上蒸於肺而

爲嗽此自內而發者也然風寒暑濕有不爲嗽者蓋
所感者重經傷臟腑不留於皮毛七情亦有不爲嗽
者蓋病尚淺止在本臟未卽上攻所以傷寒以有嗽
爲經而七情饑飽之嗽久而復見凡諸嗽未審內外
所感並宜二陳湯加杏仁五味人參各半錢重飲水
一二口而暫止者熱嗽也呷熱湯而暫停者冷嗽也
治熱嗽以小柴胡湯加五味冷嗽理中湯加五味皆
已試之驗此出醫餘

諸嗽皆可佐以應夢觀音散而加喘者以此於食前
吞下養正丹

壅嗽聲重痰稠或咳有血以薄荷生胡麻各一撮細嚼煎蘇子降氣湯送下

感風而嗽者惡風有汗或身體發熱或鼻流清涕桂枝湯加人參杏仁五味各半錢

應嗽多汗體虛而又不勝熱藥者橘蘇散

感寒而嗽者惡風無汗或身體發熱或鼻流清涕宜杏子湯

若風寒俱感而嗽者或惡風無汗或惡風有汗頭痛身疼鼻塞薰眼涕疾稠粘者小青龍湯以上三藥傷寒太陽經有嗽者皆可用

感暑而嗽者自汗煩渴或帶寒面垢六和湯加五味子一錢

感濕而嗽者身體痛重或汗或小便不利此多乘熱入水或冒雨露或浴後不解濕衣致此宜白朮湯熱嗽咽喉乾痛鼻出熱氣其痰嗽而難出色黃且濃或帶血縷或帶血腥臭或堅如蠟肉不若風寒之嗽痰清而白宜金沸草散仍以辰砂化痰圓或薄荷煎八風丹含化熱嗽於金沸草散中加五味杏仁茯苓足成十品入棗子一箇同煎功效尤勝名旋覆湯有熱嗽諸藥不效竹葉石膏湯去竹葉入粳米少加

知母多加五味杏仁此必審是伏熱在上焦心肺間可用

有熱嗽失聲咽痛多進冷劑而聲愈不出者宜以生薑汁調消風散少少進之或只一味姜汁亦得冷熱嗽後失聲者尤宜嗽而失聲者非獨熱嗽有之宜審其證用藥佐以橄欖圓含化仍濃煎獨味枇杷葉散熱服

冷熱嗽因增減衣裳寒熱俱感遇乍寒亦嗽乍熱亦嗽飲熱亦嗽飲冷亦嗽宜金沸草散消風散各一貼和煎或應夢人參散或欵冬花散二母散仍以辰砂

化痰圓八風丹或四和圓含化七情饑飽嗽無非傷
動臟腑正氣致邪上逆結成痰涎肺道不理宜順爲
先四七湯半貼加桑白皮杏仁五味子人參阿膠各
半錢

有嗽血痰與食俱出者此蓋飲食失節致肝氣不利
而肺又有客邪肝濁道肺清道清濁相干宜二陳湯
加木香杏仁細辛枳殼各半錢

有飲冷熱酒或飲冷水傷肺致嗽俗謂之湊肺宜紫
苑飲勞嗽有久嗽成勞者有因病勞久嗽者其證寒
熱往來或濁熱無寒咽乾喘痛精神疲極所嗽之痰

或濃或時有血腥臭異常語聲不出者補肺湯半貼
加杏仁貝母款冬花阿膠百合各半錢煎去渣調鍾
乳粉咽痛者更加桔梗半錢熱甚者更加秦艽半錢
嘔者去地黃加半夏如其數氣急者加靈砂丹或三
炒丹

經年累月久嗽不已服藥不瘥餘無他証却與勞嗽
不同宜三拗湯仍佐以青金丹

脾胃如常飲食不妨者加味人參清肺湯參粟湯有
暴嗽服藥不効者或教之進生料鹿茸丸大兔絲子
丸方愈此乃腎虛所致有本有標却不可以暴嗽爲

疑遽補之非然所以易愈者亦覺之早故也

嗽而有血見諸血門嗽血證

時行嗽發熱惡寒頭痛鼻塞氣急狀如傷冷熱連咳
不已初得病卽伏枕一兩日卽輕記壬午秋滿城有
此病繼時甲午年夏秋之交此病又自南而北得免
者少並呼爲蝦蟆瘟用參蘇飲加細辛半錢

哮喘

喘氣之病哮喘如水鷄之聲牽引胸背氣不得息坐
卧不安此謂嗽而氣喘或宿有此根如遇寒暄則發
一時暴感並於前嗽藥中加桑白皮則續加仍吞養

正丹間進青金丹風寒喘嗽宜九寶湯若乾喘不嗽
不分久遠近發宜蘇子降氣湯或神祕湯吞養正丹
重則四磨飲或六磨飲吞靈砂丹或應夢觀音散吞
養正丹尤宜

喘而服藥不効者利導之宜神保丸大便已溏者不
可用

不嗽而氣自急有二證須用分別有外邪迫肺而氣
急者病初得氣不急必兼外証此謂之喘若用耗氣
除邪之藥則元氣愈脫而氣愈上奔矣宜於虛損門
氣急痰證求之氣急而膈間更有刺痛處宜分氣飲

治嗽與喘用五味爲多但五味有南有北生津止渴
潤肺益腎治勞嗽者宜用北五味若風邪在肺宜用
南五味不若二者兼用

嘔吐 附惡心

嘔與吐之辨已於傷寒論之然証亦不一有寒嘔有
熱嘔氣嘔痰嘔吐食嘔吐血吐虵惡心乾嘔除熱嘔
吐血外近世嘔吐二字皆通用然却無甚利害理亦
自不妨並小半夏茯苓湯或二陳湯或理中湯多加
生姜煎生姜嘔中之聖藥大痛色如青菜葉者死
寒嘔中脘停寒食積喜辛熱物入口即吐出宜二陳

湯加丁香十粒或理中湯加枳實半錢不效則溫中湯甚則附子理中湯或丁附湯並須冷服蓋冷遇冷則相入庶不吐出有痰飲粥藥到口卽吐人皆謂其番胃非也此乃痰氣結在咽膈之間宜先以姜蘇湯下靈砂丹俟藥可進則以順氣之藥繼之

外有吐瀉及痢疾或腹冷痛進熱劑太驟以致嘔逆宜二陳湯加砂仁白豆寇各半錢甚則入沉香少許寒熱氣食痰血六嘔外有漏氣走哺漏氣者上焦熱食必先吐而後下汗出身胃熱走哺者下焦熱氣逆不續大小便不通嘔吐不禁

熱嘔見諸傷門傷寒嘔吐證凡進熱藥愈增者當於寒嘔中求熱嘔宜二陳湯加黃連一錢氣嘔胸滿膈脹關格不通不食常飽食則常氣逆而吐此因盛怒中飲食而然宜二陳湯加枳實木香各半錢或吳茱萸湯不効則丁沉透膈湯及五膈寬中湯

食嘔多因七情而得有外感邪氣并飲食不節而生大槩治以理中爲先二陳湯加枳實一錢或加南星七分沉香木香各四分亦好或只服枳南湯或導痰湯

又有中脘伏痰遇冷卽發俗謂之冷癰或服新法半

夏湯或抵脾湯外有熱痰而嘔者宜小半夏茯苓湯加竹茹如錢大若嘔痰而或致厥者乃寒痰逆悶謂之痰厥宜姜附湯以生附代熟附

吐虵乃胃寒所生經云虵者長蟲也胃中冷則吐虵成虵厥宜理中湯加炒川椒五粒檳榔半錢吞烏梅丸惡心乾嘔欲吐不吐心下映漾人如畏軀宜大半夏湯或小半夏茯苓湯或理中湯治中湯皆可用

嘔吐諸藥不効當借鎮重之藥以墜其逆氣宜姜蘇湯下靈砂丹須百粒作一服俟藥得効却以養正丹半硫圓導之嘔吐津液既去其口必渴不可因渴而

遽以爲熱

又有嘔吐諸藥不効又別無前項痰氣等証乃虵在胸膈作嘔見藥則動動則不納藥藥出而虵不出雖非吐虵之比亦宜用吐虵藥或於治嘔藥中入炒川椒十粒虵見椒則頭伏故也

曾有患人用附子理中湯四逆湯加丁香到口卽吐後去乾姜只參附加丁木二香煎熟更磨入沉香藥立吐定蓋虛痰氣凝結丁附旣溫佐以沉香則通乾姜白朮則泥耳

吐血

見血門

停飲伏痰

飲凡有六懸溢交痰留伏痰飲特六飲之一耳人病此而止曰痰飲者蓋停既久未有不爲痰多因氣道閉塞津液不通譬如溝渠壅遏積淹停滯則倒流逆上瘀濁臭穢無所不有若不踈決溝渠而欲澄治已壅之水而使之清無是理也

凡爲喘爲咳爲嘔爲泄爲眩爲暈心嘈怔忡驚悸爲寒熱痛腫爲痞膈爲壅閉或胸脇間輾轉有聲或背心一片常如冰冷皆飲食所致此卽如水之壅有瘀濁臭穢故善治痰者不治痰而治氣氣順則一身之

津液亦隨氣而順矣並宜蘇子降氣湯導痰湯各半貼和煎或小半夏茯苓湯加枳實木香各半錢吞五套圓或以五套圓料依分兩作飲子煎服尤好平居皆無他事只有痰數口或清或堅宜二陳湯小半夏茯苓湯痰多間進青州白圓子和來復丹服來白圓如和以八神來復丹卽名青神圓此非特治痰飲尤甚療喘嗽嘔吐逆番胃若服藥未効者二生湯加水香半錢若頑涎隨氣逆上不爲藥鮮當自下部利之宜五膈寬中散加半夏半錢吞破飲圓仍佐以半硫圓恐大便復祕飲利不盡半硫圓當常服若大便先

不因藥自利及老人虛人當利其小便宜小半夏茯苓湯改用赤苓而倍之或導痰湯加猪苓半錢痰飲暈眩及成飲厥者宜別加木香二生湯吞青州白圓子和靈砂丹名青令丹或吞養正丹半硫圓痰飲流入四肢令人肩背痠疼兩手軟痺醫誤以爲風則非其治宜導痰湯加木香姜黃各半錢

病痰飲而變生諸証不當爲諸証牽掣妄言作名且以治飲爲先飲消則諸証自愈有卒然昏悶口眼喎斜似中而實非中四肢戰曳身如浮雲似虛而實非虛皆痰飲所爲也又有腎虛寒不能攝水致邪水溢